

50,000 pelajar baru IPTA disaring



Wabak selesema babi

KUALA LUMPUR - Hampir 50,000 pelajar baru yang mendaftar sebagai penuntut di empat Institusi Pengajian Tinggi Awam (IPTA) semalam diarah menjalani pemeriksaan saringan sebagai langkah pencegahan awal virus selesema babi.

Keempat-empat IPTA itu ialah Universiti Putra Malaysia (UPM), Universiti Teknologi Mara (UiTM), Universiti Teknologi Malaysia (UTM) dan Universiti Pendidikan Sultan Idris (UPSI) yang menjalankan saringan mengikut prosedur yang telah ditetapkan oleh pihak pentadbiran universiti masing-masing.

Ketua Bahagian Komunikasi Korporat UPM, Abdullah Arshad berkata, kira-kira 4,000 pelajar baru terlibat dalam saringan yang diadakan selama dua hari bermula semalam di Pusat Kebudayaan dan Kesenian Sultan Salahuddin Abdul Aziz Shah, UPM di Serdang.

Menurutnya, semua pelajar baru diarah menjalani saringan tersebut sebelum mendaftar ke kolej kediaman masing-masing.

"Langkah ini diambil bagi menangani penularan wabak tersebut memandangkan surat tawaran telah dikeluarkan kepada semua pelajar baru," katanya.

Sebelum ini, Menteri Pengajian Tinggi, Datuk Seri Mohamed Khalid Nordin telah mengeluarkan arahan supaya semua IPTA menubuhkan pasukan khas bagi memantau penularan virus selesema babi



SEORANG pelajar baru, Rahimah Abdul Rahman (dua dari kanan) menjalani ujian saringan selesema babi ketika mendaftar di UPM, Serdang semalam.

di semua IPTA.

Sementara itu, di Johor Bahru, Penolong Pendaftar, Perhubungan Awam dan Komunikasi Korporat UTM, Sabri Ahmad berkata, para pelajar baru diminta mengisi borang pengisytiharan kesihatan sebelum menjalani pemeriksaan kesihatan yang dikendalikan oleh pembantu perubatan universiti itu.

"Dalam ujian saringan hari ini (semalam), kesemua pelajar berjaya melepasi saringan," jelasnya.

Seramai 3,472 pelajar tempatan mendaftar di UTM selama dua hari bermula semalam manakala 241 pelajar asing pula akan mendaftar esok sebelum diikuti 3,000 pelajar pasca ijazah pada 1 dan 2 Julai.

Di UiTM Shah Alam, seramai 14,443 pelajar baru terlibat dalam saringan kesihatan di kaunter khas yang disediakan.

Jumlah pelajar yang mendaftar itu adalah sebahagian daripada 34,137 pelajar baru yang akan mendaftar di 14 kampus cawangan UiTM di seluruh negara.

Dalam pada itu, di Tanjung Malim, Perak, UPSI akan mengadakan pemeriksaan kesihatan menyeluruh ke atas lebih 5,000 pelajar baru yang akan mendaftar hari ini.

Pengarah Bahagian Korporat dan Antarabangsa UPSI, Prof. Dr. Mohammed Zin Nordin berkata, pemeriksaan itu turut melibatkan 35 orang pelajar antarabangsa.